

煙霞萬古樓文集

二



煙霞萬古樓文集

二

王
曇
撰

中
華
書
局

叢書集成初編

煙霞萬古樓文集 二冊

中華書局出版發行

(北京王府井大街三十六號)

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

煙霞萬古樓文集卷五

爲吳江紳士呈請故贈光祿寺卿浙江按察使司前鞏秦階兵備道王翠庭公遵新例於本縣建昭忠祠狀

竊死有五節。獨疆場之餘勞爲足書。祀有七名。惟祐主之無歸爲足卹。故祠官經典以能死勤事者入昭忠。郡縣章程以別建專祀者。著令甲紳士某等援周官旁招堂贈之禮。引鄉社族厲鬼歸之法。有故贈光祿寺卿浙江按察司前鞏秦階兵備賜進士出身兵部車駕司主事王某。籌軍餉道。裹革隴西。一葉身輕。皇上已予之葬。而予之祭。九層天大聖恩復贈以廕。而贈以卿。努力酬知。竭誠奉職。制詞之龍光也。見危授命。臨難捐軀。溫綸之敷錫也。其嗣子某。捧璽書而泣血。淚盡眶枯。其嗣孫某。承懿詔以受官。天遙地重。是何敢於窮泉雨露之外。再乞馨香。幽光日月之中。復求毛血。獨是熊光哭墓。少尺地以廬其子孫。韓弇死邊。無一薨以藏其匱主。不崇社祭。則樂公之餒何歸。不立叢祠。則桐鄉之魂無託。某等是敢粗具見聞。略摭行實。丐恩節府待命臺司。初光祿承上命備兵鞏昌也。洸以外雷公飛燕之妖。秦以內牛角羶根之賊。光祿疑以傳車走六百里書。而一駝負三十日食。則不若舍張綱單輅。就杜周一馬。掛不疑樞劍。脫暴勝繡衣。直覘賊壁。殺門。竟揖將軍。潮上。大府松公筠。署光祿爲徽成軍需總事。於時也。民有梓里杞土之

勤官無葉稅穀租之供。茹陂七處。咸慮攻瑕。倅馬什羣。皆來就草。鞏昌之守。或以爲軍興費大。疑鄧隨之在涼州。地險山多。恐鄭莊之遠千里。光祿乃告大府。省糧臺。啓元戎。撤調劄。故其守岷洮二城也。棋乾。豎豆。盡爲軍儲。魚膏草苦。皆資戰備。甘境之賊。爲藍線。白線。懷竄無定。光祿以爲不編魚陣。則蓋動莫殲羌人。但寫孝經。則宋梟豈辦隴賊。遂乃求臨溜之弩兵。募煎靡之勇將。火矢五十爲排。馬士一千成隊。撻匪人於舫中。計殺賊於功簿。檄三郡二十一縣。得民兵八千餘人。凡一切解仇交質之豪。弛刑應募之衆。倉頭廬兒之厮。白虎揚威之校。莫不出魏尙私錢以買犒牛。設虞詡三科而賞壯士。光祿又遠修斥堠。內壁堅營。木樵漸壘之堡。中周虎落之樓。尺籍伍符之書。蘭石渠答之器。不半月中。成二千所。兩當之戰。賊帥張漢潮由鳳縣攔入。光祿衷甲抽戈。囊韃負鉞。如馬融之假部號。蘇命西羌。似文聘之隊一軍。親當石梵。或賊去三舍。或虜來十步。或持重如韓安。或力戰如張羽。賊又偵伺糧臺。窺覷成縣。率烏合二萬。圍城門三日。光祿偃旂臥鼓。示之活門。拔旆投衛。蹙之死地。及賊之疑。則又潛出環槍。捷被慶甲。斷田疇。平岡之磔。署國淵首級之簿。當此之日。擊長離而諸羌散。邀枹罕而涼州平者。以光祿八千鄉勇爲長城也。秦階地連川陝。大營五六處。官兵十餘萬。流寇所竄。追軍所屯。時或賊壘居內。官營處外。光祿乃明脩流馬。暗餉陳倉。冒程昱之膽。送鍾會之馬。蜀中方一日而十驚。峻軍乃十道爲一部。知公武者。謂王脩必冒難而來。笑公文者。謂孔融乃成軍而出。光祿有募士王元佐者。西和鄉貢生也。生能挾輶。死猶嬰足。實南八之

男兒爲史慈之名士。死之日曰。我從張睢陽乎。無負嚴將軍也。識者謂子桑知人。曰季舉士。無以過此。嘉慶某年。軍功上計。皇上命爲浙江按察。光祿自以未殲餘醜。必靖羌涼。且大府以慶忌爲爪牙官。恐湟中有重腿疾。乃遮劉勳以安部曲。留杜畿以鎮河東。光祿於是繕平涼州邑之壁。置流民棲宿之所。給牛犁籽種之資。脩掩骼埋胔之政。或疑于禁鬻蒼葛公食少。則光祿已於五年二月伏羌觀病。然猶覆頭柏孝。負大盾而習勞。擁膝高柔。抱文書而臥看。伏枕之日。口占朱博檄文。夜問賁麗星象。直至七亡七死之時。猶操九拒九攻之算。到十舉十危之地。尙畫三沮三仞之謀。及自知不起。人說彌留。始乃召丞椽爲先令。書呼長子爲鑿楹語也。巢門有鳥。雖張珩自知死期。夕陽在亭。豈楊震竟無歸魄。况乎豫州百姓。尙爲陳實圖形。焉有梓里九親。不見倉慈畫像。今其嗣子通判某。寄居吳江本族。名爲士著。實則寓公。抱胡公之祭器。俎豆無家。載木主之先君。衣冠無廟。伏蒙皇上賜有恩卹銀兩。尙留公庫。未緝私囊。可否馳牋上臺。下牒本縣。卽君父貸死之金錢。爲臣子藏衣之夾室。卽叔敖期思之首邱。爲石相棲神之泊宅。乞於吳江縣境擇地一區。置王光祿專祠一所。以神主祔升昭忠祠。忠臣忽祀。魂則在羌湟水中。大招若來。鬼不死。玉門關外。

虎邱建白太傅祠堂狀

伏考禮祭之法。以能捍菑患爲功勞。郡國之典。亦得索鬼神而祭祀。以故陸雲去縣。浚儀之俗祀其神。石

慶相齊。卽墨之民配諸社。或以報功。或以示本。承而勿替矣。吳郡鳬鴈爲鄉。舊稱澤國。初時也。范蠡闢長洲之濱。地尙龜宮。子胥叱潮水之潮。人離魚府。洎至黃歇城吳。水分四縱。韓臬布地。波奠三江。所由禁社。蔓連叢祠。屋接五花樓下。盡刻高公水政之文。四絕碑中。大書禹鑿了溪之事。固已祀法粗疎。祭儀略備。已。獨是香山一瓣。空題刺史橋名。粉水千年。未立江州祠廟。如唐太傅白文公之刺史是邦也。太湖五宿。有三年去郡之詩。武阜兩壕。開七里橫波之路。散龍口而築濤門。灑彪池而通斗戶。常使長干靚女。盪花市以川游。大隄行人。泛酒城而水戲。設不塞海眼以金錢。賂波神以玉璧。焉知不地尙陸沈。山仍海湧也。嘗考昌黎訟旱。有懲呵風伯之文。表聖愁霖。有痛斥雨師之檄。是明神有吐食之嗟。功德歸馨香之薦歟。公身尙謚言。史明直道。論河東入相。豈容褻越平章。斥于顛佞人。不許曲歸天子。且復奪中官兵柄。謂承瓘不可監軍。竦天下忠臣。謂奉國宜假節度。至今讀虞人之戒。字字忠言。當年詠新井之篇。人人忌口。夫豈但年尊九老人重鷄林。祭倉頡爲文神。鑄閭仙爲詩佛也已哉。按祭神二義。王充主于報功。祀事十名。許慎兼以會福。公八灘手鑿。六井重甃。想當日虎山立碣。水號流桑。鶴市蒸隄。洲名種荻。水功紀在五湖。官澤流諸三泖。豈可使白蛇廟壁。弗題魯峻碑陰。黃水祠門。不建李剛石室。今虎邱東麓有五賢祠者。但陳豆俎。不述勤勞。亂列衣冠。無關祭法。且復西門靈館。法字欽頽。晉川涼堂。神宮墜場。若非郎官水上。另書李白文章。太傅湖邊。別塑謝安神像。是何異沉碑峴首。棄羊祜於荒阡。作廟羅池。屏宗元於瘴海。卑府

等擬於塋影舊園。建白刺史祠堂一所。髣司馬遷夏陽覽古。再列桓楹。視卜子夏峴谷棲遲。重安杵臼。庶幾樂陵墟館。記府君往日遊神。瓠子金隄。志子貢舊時工築。燎牲磔犬。有歲常豐。而郭臨岡。無堂不同。伏懇綿田桂樹。榮書介子之祠。木主石龕。永拜北君之廟。除申藩臬。伏乞施行。

上達香園尙書乞改名良士狀

竊惟烈士殉名。君子疾沒。是以顧雍佳士。慕中郎之才而借名。鄧艾農人。讀太邱之碑而改字。名以立義。孤而不更。古之制也。曩待罪公車。計偕選部。又數年矣。雲間日下。恥士龍鳴鶴之再來。四海彌天。悲鑿齒道安之又至。司馬公兒童皆識。愧其相才。韓伯休婦女皆知。焉能賣藥。語曰。避名名追。逃名名隨。非黃瓊之名難副。抑樊英之名太盛乎。前者浩然牀下。累王維之一呼。賈誼小生。誤吳公之謬薦。於時服虔改姓。畏師門崔烈之春秋。鄭元亡名。懼帳下馬融之禮樂。曩聞宋庠避諱。以郊爲嫌。趙岐逃難。以嘉爲諱。茲之呈改舊名者。非傳變之慕南容。實劉備之畏北海。大部憐葛靚之義。問自字仲思何居。愛嘉貞之才。恐他日中書誤報。是猶欲鄭君以籍名求官。希楊朱以死名潤骨也。呼劉胡而止啼。聞花卿而已瘡。大部何望乎狀元之必中老夫。進士之不諱晉肅哉。或者劉向更生。辛文不死。峴山再刻。鴈塋重題。識狐篤之爲馬忠。知范睢之爲張祿。去戈則爲柳渾。加日則爲程昱。安知滕曇恭之卽非曾子。黃叔度之不爲顏淵乎。慕樂天者黃。慕李白者碧。如曩者力學晁年。隱名中歲。變范蠡以陶朱。豈忘功名。改董璽以仲舒。自傷今昔。

伏惟大部俯准稽顙。聽從疎束。庶幾易杜牧之名。白駒皎皎。仍唐風之字。良士瞿瞿。呼華陽貞逸。山中知有隱居。稱糞土愚臣。朝廷識爲方朔。謹狀。

重修潮海寺啓

朝梧啓。伏惟法華一雨。是地皆落。毗首千堂。無金不布。能以一瓶瀉大海之瀾。卽以甘露起梵王之國。是在法王大力。無容咒鉢呼龍。而在越士檀施。敢不鑒金報佛。阜城縣潮海寺者。始唐貞觀之初。越宋政和之末。因法運爲廢興。隨世輪而毀立。方一吹而成世。卽變五而化劫。灰至於今也。蓋已古矣。寺爲齊右夷庚。燕南使候。刹竿初倒。在乾隆癸丑之年。彌勒當來。逢司寇玉公之至。因決獄而賦東山。乃芟舍而留南國。時也。飯王宮裏。正讀神農求雨之書。防風國中。忽來大禹騎龍之駕。民方磔犬而弗靈。公乃斬龍而不拜。爰是默禱天神。靜惟佛力。繞牀一匝。十地雄雷。彈指三聲。八天大雨。遂使老人舞國。不殺巫尪。元女下天。得收妖魅。人謂使君隨車之雨。公謂仁王護國之霖。是冬。大司寇胡公。亦銜主上之命。往察東人之獄。入瓦官破寺。讀靖康殘碑。方停車而住初地。亦秣馬而弔諸天。目覩宿桑迦釋。土面風吹。獻花文殊。泥容露立。慨楞伽化作荒山。咤兜率鞠爲漏澤。遂欲以羯磨大斧。重修戰勝之堂。且思以舍利餘灰。再起忉利之墟。某士民長官。佛天弟子。既分符於一郡。又受命於兩公。始擬以五十九年之秋。爲萬八千功德之始。而其時毒龍作孽。飄于生波。蕩鹿苑於尼河。沉鷄山於香海。幾使鷓鴣佛土。祇留大海一漚。帝釋天人。

盡證水光三昧。此給孤長老。分金布地之遲。優闡賢王。慕佛雕檀之晚者也。今歲玉燭萬年。人安俗乂。金剛四位。雨順風調。某念前誓因緣。感諸方護力。爲大司寇立頭陀之碣。地利當興。爲少司寇作喜雨之亭。佛恩當報。是用工召魯輸。匠呼宋墨。爲法華造此世界。與楞嚴改作講堂。敢布同官集腋。咸分大力與瓢。務使母陀手臂。衆舉而造天宮。勿口須彌鼓椎。獨拳而打大地。是序大凡。乃爲小引。善財五十三參之拜。佛佛書名。蛟龍七十二座之碑。人人署號。

煙霞萬古樓結集自序

太元之草成。而劉歆欲覆瓿。三都之賦出。而士衡欲蓋酒甕。同是時也。桓譚以爲絕倫。張華爲之紙貴。豈文無定體。嗜痂者有異癖。嬖眇者多一目歟。李百藥曰。文章者性情之風標。神明之律呂也。張融自序曰。吾文章之體。多爲世人所驚。又曰。文豈有常體。丈夫何至因循寄人籬下。裴子野論文曰。人皆成於手。吾獨成於心。北齊祖瑨亦語人曰。文章須自出機杼。成一家風骨。何能共人生活哉。讀劉勰之雕龍。不如通擊虞之流別。讀鍾嶸之詩品。不如追韓嬰之傳說。見其委海若天吳。見其原岷觴積石。統四千年之文。爲一文觀。合四千年之詩。爲一詩釋。而古今詩與文之正變。洞然胸中矣。法律一新。如曹參守蕭何之文。旌旗一變。如光弼將子儀之軍。非謂師涓奏樂。必造新聲。徐摛作文。不拘舊體也。或曰。延年隘薄。靈運空疎。爲之奈何。曰。此不盡讀天下之書與詩文。而漫然操觚之謂也。漢郭憲。王嘉。全搆虛辭。孟堅所以致譏。

張華爲之絕倒。抱朴子所謂懷空抱虛。有似蜀人蒟蘆之喻乎。南史氏曰。文章容易述峭難。又曰。文章不
斌媚。正如疥騶駝。今世之勉力宏詞者。班馬奇字。白孔陳羹。華林類苑。疊韻雙聲。驟焉而蘇綽大誥。忽然
而王莽金縢。著淵通以擬道德。仿太元而作測靈。以艱深文其淺陋。以奇險幸其功名。揚雄以爲曉曉之
學。繡其聲貌。而目之爲翰林主人者。非也。亦有好事焉者。鑄賈島而拜。像東坡而祀。蜜膏飲杜少陵之灰。
遍體刺白香山之字。老兵之貌中郎。優孟之學期思。高冠大屐而自居某一家之詩。與文者悖矣。氣水也。
言浮物也。袁先生曰。重而能行。乘萬斛舟。重而不行。猴騎土牛。水浮而物之浮者。大小畢浮。不然。而任昉。
沈約結其集。魏收。邢邵爲之偷。斯文之末流也。鼻馬頰牛之論。中軍聽之而生爭。搗薑噉杵之談。洗馬思
之而成病。則又斯文之魔業。翰墨之覺境。至若宏通碩彥。經師大儒。鄭元之文。通人不取。溫公之筆。四六
不能。此不可以辭章律之者。其經濟大也。樂旨潘詞。廣談虞筆。二千年以下兼而有之者。繁何難哉。予髫
幼成文。中年萬里。經史爛於胸中。雲山亂於脚底。自以爲才學識皆當有也。乃志功名。急經濟。遭臺官之
禍。纂述之成書者。經史之論辨者。樂府之未諧宮商。金石之未付雕鐫者。吳中郡縣官持抱以去。而摯仲
治半世之文書蕩然矣。並非關通丁謂之書。而概與一燒。亦不借重洪喬之寄。而投之江底。此砥柱之沉
災。榮宮之火洗。當時也。郭子橫之救火。任文公之逃水。何暇計及著與撰之存焉否耶。幸而王陽焚道。險
路求生。韓愈華山。危途獲濟。或藏之殷浩手巾。或寄之王恭如意。主人莊子。僅留漁父殘篇。中書孝經。惟

剩王混摘句。抑不啻嵩山蠅斗之文。顯節陵中之蠶也已。竊惟彥章死豹名。以皮留。楚國神龜。生以骨貴。而乃陸澄著述。力已倦於經年。任昉屬辭。才將盡於晚歲。五行志少。尚可暗抄。三篋書亡。多難默背。憶當日十吏環書。五題盈集。門庭藩溷。盡是賦才。戶牖門牆。無非刀筆。沈虛而王充爲之氣衰。苦思而桓譚爲之感疾。見楊汝士蘭亭金谷。元白無詩。聞孟浩然疎雨微雲。中書罷唱。議禮經則白虎堂中。講論語則金華殿上。何其壯也。無谷子雲之筆。而空有樂令之口。無揚子雲之才。而徒有光庭之手。開頃刻之花。造逡巡之酒。斯文之道。有急就章乎。蘇明允之詩。祇有廿篇。杜子美之賦。不過十首。片羽苟重其吉光。千金可享其敝帚。僕今年四十五歲矣。前不遇古。後不遇今。死不見峴首沈碑。英雄墮淚。生不見阿難結集。活佛傷心。李旭曰。文章之事。不足傳於後世。蕭恭亦曰。千秋而後。亦復誰能傳此。嗚乎。未爲僧父。已笑衛官。纔讀離騷。便稱名士。劉季緒才非一世。偏能誹毀文章。徐孝穆一代傳人。未嘗譏訶作者。留達生廿四首丈人之集。娛我餘年。傳枚舉數十篇。必不可讀之文。自傷嫫媿。哀我文者。亦庶幾隨我言而恕我狂也。

代華頂百五十茅庵乞米啓

爲天台湧泉庵
女士陳妙因作

竊以德財竝濟。顯布施之六門。瀆食兼資。譯比邱之二義。泥連河六年行道。亦須牧女調糜。奈羅城五衆安禪。誰化道人送食。天台者。東旦之鷲峯。華頂者。南瞻之鹿苑也。獨是地隣奧壤。竝無分衛之家。宅接幽區。絕少行檀之主。無非窮子。萬二千法侶之多。盡是化城。百五十茅庵之衆。雖其炊砂作飯。道性能堅。養

石爲羹。色身難住。羅云法大。食一菜而猶羸。迦釋功高。咽一麻而必瘦。道中五漏。凡軀三禪聖業。放開頭角。託居士而譚元。墮落鬚眉。現女人而說法。山中歲月。只勤妮子針功。道外風情。誰識□陵米價。邇者法糧同置。香積同空。羅喉供衆。呵道輩爲夷齊。彌勒投齋。笑仙山爲陳蔡。甚者律明四分。無過午之頭陀。衣具七條。多呼庚之衲子。鰥魚聲裏。坐成有漏之因。飯版時中行。誤□□之果。道中嚼湯誦咒。時逢餓虎。聽經洗盃。聞鐘日見。飢猿習□。所望梵天。托鉢假佛子之神通。米汁流船。借樹神之法力。仁□起信。誰非金粟。如來善士生心。卽是好施太子。三旬九食。大千僧應荷人緣。七日一炊。五百伴誰非佛果。宗風不墜。無過困睡飢餐。佛法無多。祇此穿衣喫飯。天台寺裏。今朝鑿破砂鍋。華頂峯頭。明日踏翻碓臼。

天台國清寺建五百羅漢堂啓

原夫真性無形。無一形而不現。法身無像。無一像而不呈。張八教之綱。度法無邊。立五行之門。度機無量。誘凡夫於天界。覩金色者發心。憩小聖於化城。見灰身者起信。駕航濟險。雖四魔習定。亦成勇猛之軍。乘炬通幽。卽六賊歸真。亦入大王之路。阿羅漢者。十聖之始階。三賢之初磴也。宋太宗時。曾敕造天台山羅漢尊像五百一十六軀。肇於雍熙之年。奉于壽昌之日。儀形古矣。志載存焉。當時也。鑄義眉百里之鐘。度天下名童者十七萬衆。建釋迦舍利之塔。脩龍門石佛者萬七千身。旣而乾明院土木之雄。尊尊有號。淨慈寺金銅之盛。像像有名。蓋不嘆學士之手題。隘以十六。夫豈徒懷安之廣塑。多逾八百者耶。耀冶。愚荷。

智超迷蒙悟度。力同蝸斧。住七祖之宗門。功類蚊梯。守九師之教寺。大悲有眼。弘誓無肩。希聖賢出處。卽應身以體眞身。感龍象與衰。卽化相以參眞相。前者耕宮墮塌。賴青衣護濃神多。紺宇虺隤。藉鴻福圓成人衆。鎔金髹漆。廿五有顯已光明。團土雕檀。八十好儼然完備。於時曇花亭下。再覩山神造寺之年。玉女峯前。重觀彌勒赴齋之日。去年先師遣教。指道場隙地爲壇。今春法衆興心。延□劫諸賢爲會。影隨形現。登中峯者見文殊萬衆而來。響以音生。陟曹山者感梵侶飛行而至。斧羣山之一木。百棟可成。畚衆土之一坏。千尊可就。廓莊嚴之境。功德如林。集歡喜之緣。慈悲如地。唯是庀功非易。冀萬善爲因依。鳩力唯艱。仰一心爲成就。儒或解囊藏事。何殊貢水歸瀛。如其輸篋程功。奚啻驅星助月。刻日材聘嵩華。匠追楊鄴。麗窮圖繪。爰新鹿苑之規。妙絕剗鐫。宛備鷄山之概。所爲穿山度石。仿童子之南求。帶水拖泥。效常啼之東請。半千年一作。寧愁手足膏騰。五萬拜不辭。豈惜鬚眉墮落。今啓貴官尊士。結人天一會之因。賢宿仁人。脩福慧雙清之果。望脩羅戰勝堂成。殊非婆達施眸。倘昆首相檀像就。誰謂豐干饒舌。

舒鐵雲姨丈瓶水齋詩集序

沈李昌谷於溷神之中。寄劉公幹於鬼伯之口。微之未死。託遺稿於香山。荀攸臨終。交阿鶩於鍾會。良士自大梁來揚。而吾姨丈人之集。成於眞州。昔宋考功毒希夷而有其佳句。齊邱子沈譚峭而有其化書。若巴樸園觀察之敦命。劖工與刊傳作。何遜卒而王僧孺集其文。崔湜死而裴耀卿纂其集。爲千古尚也。我

姨丈人位才備八廚。身行萬里。於粵則愛鐵雲之山。於黔則樂飛雲之洞。故其詩千巖競秀。萬怪惶惑。趙雲嵒八十而顛。以詩師梁山舟九十而見其書拜。其實錄也。王筠見沈約。不謂遲暮逢君。劉頤見張華。豈信人間有此。蓋讀書數倍於前輩。宜積薪居上於後來。嘉慶二年。偕我備兵叔馳驛軍營。值齊王氏火燒朱鎮而西時也。師漏多魚。翁驚失馬。入黔貴則南籠方圍。馳楚壁而襄樊正急。問道則經烟塵六十四路而遙。遇敵則會相州九節度師而戰。湖督汪文億假我叔氏勝軍三千。以田悅之親家。分猗盧之餘卒。與先生一鞭一筆。九拒九攻。纔及貴境。而雲南土練藤甲諸軍。悉隸麾下。婦人作賊。馬援之所能平。女子從軍。李廣之所不將。而時所部女官土司龍囊仙者。馬上桃花。木蘭火伴。寵以妹喜之男冠。假之敖曹之鼓蓋。壁其軍於水倒流山也。斬龍仙則惟擁二矛。禽史歸而僅馳七騎。從先生之計。又更舊將以易夷兵。變徵章而改番服。不旬月間。而女賊王囊仙致於麾下。興義之戰。以李典步騎八百。破吐番寧州三萬。力追銀鼓。生擒鬼章。論功者謂督部灰囊火馬之功。實本道輸攻墨守之奇也。南籠圍解。我叔氏以前官左降。復介君於湖楚軍營者五載。急攻則鼙下濃書。緩戰而圍城作賦。杜邛州紙豈止百番。謝公庫篋殆將九萬。房元齡軍書之奏。駐馬皆成。令狐楚白刃之中。揮毫不輟。大府初以君奏留黔中。而介推逃賞。魯連辭功。賦櫻桃爲林甫微辭。軍中作水山曲咏蜀道與嚴公寓意。要其賦性蕭閒。秉心引退。示不願爲桓冲參軍。故託意作郝隆蠻語也。叔氏嘗語予曰。吾貴州之行。泄斬叛苗一百餘萬。雖韓愈行軍不逢裴度。而令狐辟幕實

得劉蕢。蓋謂先生鄒枚之亞也。八年癸亥。與良士結鄰吳中。何蕭兩雋之巷。張陸交讓之漬。既無宏景層樓。誰與戴公築室。重陽風雨。日日催租。淞水蘓鱸。年年負米。長洲宋汝和觀察爲同人。刻今雨集也。尉良士刪鄭集之鷓鴣。屏謝詩之蝴蝶。選取雄章。多將百首。其盛氣如孔文舉。其博識如劉子駿。其貫串如酈道元。水輕注。其磊落如司馬大人游獵賦。繫是時也。趙曄第論其詩細。蔡邕已傳於京師。愛君者焚宮中媚香。不識君者亦薔薇浣讀。香山誦一首而女子價高。康樂出一篇而洛陽紙貴。無以逾矣。古之工爲詩者。或一卷擢窮。或一聯入相。或一詩得黃門。一詩得郎侍。如先生者。李泌蓬萊之閣。王珪金炬之蓮。國之光也。而乃楊徽警句未登御屏。公權法書不題殿壁。生無花樹之居。死乏西華之里。嗚呼命歟。性樂楷隸。工李主錯刀。法永公門限。穿羽陽宮瓦。寫老嫗扇頭。其與人書也。綠盆糊麪。豈惟百函。青泥封書。每馳萬里。弄陳遵尺牘爲榮。得劉宏手書爲悅。若良士之不嗜裝潢者。亦復收藏索靖之書。帶祕鍾繇之札。孔文舉謂舉篇見字。欣然獨笑。蔡中郎謂筆迹當面。相見無期。能無慟哉。精音律。工三絃。亦習弄笙笛。彈琵琶。則鸚鵡立聽。奏羯鼓而羣羊蹶踴。十四年己巳。與太倉畢子筠華珍流寓京國。作伶元通德吳剛脩月數十餘齣。微服聽酒樓之原調。

唐陶山觀察傳疑錄徵事啓

國語證經。民謠著史。自公羊定傳聞之例。漆園發寓言之凡。信以傳信。擇其尤雅。疑則傳疑。見於他說是。

以韓非述事。務乎兩存。鄒衍談天。驗之小物。灑神人之墨汁。道德五千。駕使者之黃車。輜軒九百。皆有補於教化。實足資乎簡編。昔裴松注三國。盡輯異聞。景文作唐書。兼收小說。使汲冢不藏紀年。二代幾無正朔。康成不探讖緯。五帝幾無名號。况乎神怪未明。桓子將欺以獲狗。浮夸必斥。劉氏且昧夫象龍。是知傳疑者。傳信之肴蒸。傳信者。亦傳疑之炙轂也。且夫天道好遠。風霆顯其至教。人心不死。冰雪表其精誠。匹夫匹婦。愚而神。一動一言。衷諸道。閭史之所未載。鄉老之所樂稱。若無徐廣。劉向之長篇。王粲。戴逵之短部。將名湮於談藪。事闕於語林。抑亦有道仁人之所深惜歟。庖丁輪扁。柳梓韓圉。五行方技之流。二氏因果之諦。名物象數。鳥獸蟲魚。見智見仁。可歌可泣。卞壺整衿以爲禮法之文。王衍揮麈以爲清談之助。郢書燕說。誤亦可思。笑鰈官鯖。婉而善入。則譌趣勝於莊語。譌論寓於庾辭矣。至若伶元。據通德微辭。白帝拾神童遺事。乞嫖姚太乙之精。求后土人部之夫。未免房幃勸製。卷牘誨淫。文不雅馴。搢紳先生之所難言也。蒙也足塞九垓。心賦八索。筆墨僻於嗜奇。文章耽於寓託。聆琅邪釋郢之精。悟顯頊讀翹之繆。賦蟬則文無二千。徵貓亦事少七十。苟非揚子雲之鉛槧在懷。左太冲之門藩皆設。安能效匡鼎之解頤。隨野王之著脚。此傳疑一書之所由作也。是書也。類無取乎區分。文勿嫌於累牘。義主遏惡而揚善。辭貴微顯而闡幽。不傷名教。則滑稽之雄也。不惑異端。則機鋒之妙也。不及時政。則野曝之獻原闕。